



- Neste caso a "inversora" ten 82 anos de idade, apenas sabe ler ou escribir e segue utilizando a peseta como moeda de referencia, segundo a sentenza.

A afectada, unha muller de 82 anos sen ningunha clase de coñecementos financeiros, xa conseguira a restitución de 62.880€ mediante un acordo coa entidade. Agora, un xulgado de primeira instancia obriga ao banco a devolver os 24.000 euros que aínda lle debía. Segundo da conta a Asociación de Usuarios afectados Por Permutas e Derivados Financeiros, trátase dunha muller de 82 anos que investira todos os seus aforros en participacións preferentes de Novagalicia. Ante a imposibilidade de recuperar os seus aforros, viuse abocada a reclamalos por vía xudicial. En primeiro lugar logrou chegar a un acordo por parte do diñeiro investido, pero a entidade seguiuille retendo 24.000 euros. Agora o xulgado de primeira instancia número 1 de Vigo deulle a razón, e condena a Novagalicia a devolverlle a totalidade do investido.

A sentenza faise eco da situación da muller: unha muller de oitenta e dous anos de idade que apenas sabe ler ou escribir e que segue utilizando a peseta como moeda de referencia para os seus aforros. Ante esta situación, xa parece a priori complicado que puidese comprender adecuadamente os termos do produto que estaba contratando. A entidade bancaria alega que actuou con dilixencia e que informou das condicións á clienta tanto de forma oral como por escrito. Con todo, non consegue probalo e a xuíz entende que actuou con dolo e que concorre un vicio do consentimento invalidante do contrato.

Así, baixo a dirección letrada de Alba Márquez Caamaño, lógrase a condena á entidade a devolver os 24.000 euros que aínda debía. Esta cantidade vénse a sumar aos máis de 62.000 euros que xa recuperara, conseguindo a afectada recuperar os 90.900€ que investira en preferentes de Novagalicia e que por fin lle serán restituídos. Todo iso con expresa condena en costas á demandada.